

الحمد لله رب العالمين والصلوة والسلام على خير خلق الله محمد بن عبد الله وعلى آله وصحبه وسلم، وبعد.

﴿مَنْ رَمَضَانَ الَّذِي أَوَّلَ يَوْمٍ الْقُرْآنَ مُتَّبِعًا لِكُلِّ نَفْسٍ وَيَسْتَمِعُ مِنَ الْهَدْيِ وَالرَّحْمَةِ﴾ [البقره: ١٨٥]

Maksudnya: {Bulan Ramadhan, bulan yang di dalamnya diturunkan (permulaan) al-Quran sebagai petunjuk bagi manusia dan penjelasan-penjelasan mengenai petunjuk itu dan pembeda (di antara yang hak dan yang batil)}. [Al-Baqarah: 185]

Risalah ini sebagai satu *tazkirah* tentang beberapa kelebihan bulan Ramadhan serta apakah amalan yang sepatutnya diisi sepanjang bulan yang mulia ini.

Semoga ianya menjadi panduan dan membangkit semangat untuk beramal dengan sebaik-baiknya.

Allah ﷻ telah menjadikan bulan Ramadhan sebagai satu bulan yang mulia berbanding bulan-bulan yang lain dengan beberapa kelebihan dan keistimewaan, antaranya ialah:

- Bau mulut orang yang berpuasa lebih wangi daripada haruman kasturi di sisi Allah.
- Para malaikat memohon keampunan untuk orang yang berpuasa sehingga dia berbuka.
- Syurga dihias setiap hari pada bulan Ramadhan.
- Syaithan-syaithan dibelenggu sepanjang bulan Ramadhan.
- Pintu-pintu syurga dibuka dan pintu-pintu neraka ditutup.
- Terdapat pada bulan ini *Lailatul Qadar* yang mana ianya lebih baik daripada seribu bulan. Sesiapa yang tidak mengambil peluang untuk membuat kebaikan dan beramal padanya maka dia telah melepaskan semua peluang kebaikan.
- Orang-orang yang berpuasa akan mendapat keampunan pada malam yang terakhir daripada bulan Ramadhan.
- Pada setiap malam Ramadhan tersenarai di sisi Allah nama-nama hamba-Nya yang bebas daripada api neraka.

Di antara amalan yang wajib dan amalan sunat yang sangat digalakkan melakukannya pada bulan Ramadhan ialah;

1) Berpuasa :

Sabda Rasulullah ﷺ:

﴿كُلُّ عَمَلِ ابْنِ آدَمَ يُضَاعَفُ، الْحَسَنَةُ عَشْرًا أَمْثَلَهَا إِلَى سَبْعِينَ مِائَةً ضِعْفًا، قَالَ اللَّهُ تَعَالَى: إِلَّا الصَّوْمَ؛ فَإِنَّهُ لِي وَأَنَا أَجْزِي بِهِ، يَدَعُ شَهْوَتَهُ وَطَعَامَهُ مِنْ أَجْلِي. لِلصَّائِمِ فَرْحَتَانِ: فَرْحَةٌ عِنْدَ فِطْرِهِ، وَفَرْحَةٌ عِنْدَ لِقَائِ رَبِّهِ. وَلِخُلُوفٍ فِيهِ أَطْيَبُ عِنْدَ اللَّهِ مِنْ رِيحِ الْمِسْكِ﴾ [مسلم: ١١٥١]

Maksudnya: “Setiap amalan anak Adam itu digandakan pahalanya, satu kebaikan seumpama sepuluh, hingga 700 kali ganda.

Allah berfirman (dalam hadis qudsi): Kecuali puasa, sesungguhnya ia adalah untuk Aku dan Akulah yang akan memberikan ganjarannya. Dia meninggalkan syahwatnya, makanannya kerana Aku. Bagi orang-orang yang berpuasa dua kegembiraan, kegembiraan ketika berbuka puasa dan kegembiraan ketika bertemu dengan Tuhannya, dan bau mulut orang yang berpuasa itu lebih harum daripada bau kasturi di sisi Allah.” [HR: Muslim dari Abu Hurairah ؓ]

Sabda Rasulullah ﷺ:

﴿مَنْ صَامَ رَمَضَانَ إِيمَانًا وَاحْتِسَابًا، غُفِرَ لَهُ مَا تَقَدَّمَ مِنْ ذَنْبِهِ﴾ [بخاری عليه]

Maksudnya: “Sesiapa yang berpuasa pada bulan Ramadhan dengan penuh keimanan dan *Ihtisab* (mengharapkan pahala) maka diampunkan baginya dosa-dosa yang lepas”. [HR: Al-Bukhari dan Muslim].

Berpuasa memberi banyak faedah kepada kehidupan jasmani dan rohani.

Dalam konteks rohani, ia amat berfaedah untuk menjinakkan nafsu yang liar, melatih untuk bersabar, memahami erti kefakiran, kesusahan dan sebagainya.

2) Ramadhan dan membaca al-Quran:

Nabi ﷺ menceritakan bahawa Jibril ؑ membacakannya al-Quran setiap tahun sekali pada bulan Ramadhan, dan pada tahun kewafatan Baginda sebanyak 2 kali. [HR: Al-Bukhari dan Muslim].

Para ulama' bersungguh-sungguh memperbanyakkan bacaan al-Quran pada bulan Ramadhan. Sebahagian mereka mengkhawatirkan al-Quran dalam tempoh 3 malam, sebahagian setiap satu minggu dan sebahagian mereka dalam tempoh 10 hari sekali. Mereka membacanya ketika di dalam solat dan juga di luar solat.

Imam asy-Syafie ؒ akan mengkhawatirkan al-Quran sebanyak 60 kali dalam bulan Ramadhan dan beliau membacanya di luar solat.

Ibnu Rajab ؒ berkata: “Larangan mengkhawatirkan al-Quran kurang dari tiga hari ialah bagi mereka yang menjadikannya sebagai satu amalan biasa yang berterusan. Adapun pada waktu-waktu yang terdapat keutamaan seperti pada bulan Ramadhan, khususnya pada malam-malam yang dijangkakan *Lailatul Qadar* ataupun ketika berada di tempat-tempat yang mempunyai kelebihan seperti di Makkah bagi orang-orang luar yang memasukinya maka disunatkan memperbanyakkan membaca al-Quran sebagai mengambil peluang masa dan tempat”.

3) Qiyamullail:

Bagi seorang mu'min apabila berada pada bulan Ramadhan akan berhadapan dengan

dua jihad di dalam dirinya. Pertama jihad di siang hari dengan berpuasa dan kedua jihad pada malam hari dengan *Qiyamullail*. Sesiapa yang berjaya melakukan dua jihad ini dengan melaksanakan hak-haknya dengan sabar dan sempuma maka ganjarannya amat besar tidak terhingga. Sabda Rasulullah ﷺ:

﴿مَنْ قَامَ رَمَضَانَ إِيمَانًا وَاحْتِسَابًا، غُفِرَ لَهُ مَا تَقَدَّمَ مِنْ ذَنْبِهِ﴾ [بخاری عليه]

Maksudnya: “Sesiapa yang bangun (solat) pada bulan Ramadhan dengan penuh keimanan dan *Ihtisab* (mengharapkan pahala) maka diampunkan baginya dosa-dosa yang lepas”. [HR: Al-Bukhari dan Muslim].

﴿وَعِبَادُ الرَّحْمَنِ الَّذِينَ يَمْشُونَ عَلَى الْأَرْضِ هَوْنًا وَإِذَا خَاطَبَهُمُ الْجَاهِلُونَ قَالُوا سَلَامًا﴾ [الفرقان: ٦٣-٦٤]

Maksudnya: {Dan hamba-hamba Tuhan Yang Maha Penyayang, mereka itu ialah yang berjalan di atas muka bumi dengan penuh rendah diri dan sekiranya orang-orang jahil menyapa mereka, mereka akan mengucapkan kata-kata yang baik. Dan orang-orang yang menghabiskan malam dengan bersujud dan berdiri semata-mata untuk Tuhan mereka...}. [Al-Furqan: 63-64].

Qiyamullail adalah kebiasaan Nabi ﷺ dan para sahabat yang tidak pernah ditinggalkan oleh mereka. 'Aisyah ؓ pernah berkata: “Jangan kamu tinggalkan *Qiyamullail*. Rasulullah ﷺ tidak pernah meninggalkannya, dan apabila Baginda sakit atau kepenatan, Baginda solat sambil duduk.” [HR: Abu Daud].

Khalifah Umar bin al-Khattab ؓ akan bersolat malam seberapa banyak, apabila sampai pertengahan malam beliau akan mengejutkan ahli keluarganya untuk bersolat, sambil berkata: “Solah, solah!” (bangun untuk bersolat).

Sebagai peringatan, setiap jemaah hendaklah menyempurnakan solat terawih bersama imam supaya namanya tertulis dikalangan orang-orang yang *Qiyam* (orang yang berdiri solat).

Abi Zar ؓ meriwayatkan Nabi ﷺ bangun bersolat bersama-sama mereka pada malam 23 sehingga satu pertiga malam, dan pada malam ke 25 sehingga separuh malam. Para sahabat berkata kepada Baginda ﷺ: “Kalaulah tuan terus sempurnakan saki baki malam kami dengan solat sunat”. Maka Nabi ﷺ bersabda:

﴿إِنَّهُ مَنْ قَامَ مَعَ الْإِمَامِ حَتَّى يَنْصَرِفَ، كُتِبَ لَهُ قِيَامُ لَيْلَةٍ﴾ [ترمذی، صحیح]

Maksudnya: “Sesiapa yang berdiri bersama imam sehingga dia (imam) beredar, dituliskan baginya ganjaran orang yang *Qiyam* semalaman.” [HR: At-Tirmizi, sahih].

4) Bersedekah:

عَنْ ابْنِ عَبَّاسٍ قَالَ: (كَانَ رَسُولُ اللَّهِ ﷺ أَجْوَدَ النَّاسِ، وَكَانَ أَجْوَدَ مَا يَكُونُ فِي رَمَضَانَ حِينَ يَلْقَاهُ جَبْرَائِيلُ، وَكَانَ يَلْقَاهُ فِي كُلِّ لَيْلَةٍ مِنْ رَمَضَانَ فَيُدَارِسُهُ الْقُرْآنَ.

فَالرَّسُولُ ﷺ أَجْوَدُ بِالْخَيْرِ مِنَ الرِّيحِ الْمُرْسَلَةِ) [بخاری]

Ibnu Abbas ؓ berkata: “Rasulullah ﷺ adalah manusia yang sangat pemurah dan Baginda akan menjadi lebih pemurah pada bulan Ramadhan... dan Baginda ﷺ lebih pemurah dalam kebaikan daripada angin yang kencang.” [HR: Al-Bukhari]

Rasulullah ﷺ menggalakkan umatnya untuk ber-sedekah mengikut kemampuan masing-masing. Sabda Nabi ﷺ [بخاری]:

﴿تَاكُتِلُوا أَيْلَةَ النَّارِ وَلَوْ بِشِقِّ تَمْرَةٍ﴾ [بخاری]

Maksudnya: “Takutilah api neraka walaupun dengan (bersedekah) sebelah tamar”. [HR: Al-Bukhari].

Imam asy-Syafie berkata: “Aku suka jika seseorang bertambah pemurah pada bulan Ramadhan kerana ia mengikuti jejak langkah Rasulullah ﷺ, kerana ketika itu manusia berhajat kepada bantuan untuk keperluan mereka. Ini kerana manusia sibuk dengan puasa dan solat (ibadat) berbanding pekerjaan masing-masing”.

Rasulullah ﷺ telah ditanya, apakah sedekah yang paling afdhal? Sabdanya:

﴿سَدَقَةٌ فِي رَمَضَانَ﴾ [ترمذی، ضعه الألبانی]

Maksudnya: “Sebaik-baik sedekah ialah sedekah dalam bulan Ramadhan”. [HR: At-Tirmizi, dhaif]. Ia mempunyai banyak cara dan cabangnya:

a. Memberi makan:

Para ulama' salaf sangat menitikberatkan amalan memberi makan dan mendahululkannya daripada ibadat-ibadat lain.

Ianya samada dengan memberi makan orang yang kelaparan ataupun kawan-kawan yang soleh dan tidak disyaratkan hanya kepada orang faqir.

Rasulullah ﷺ bersabda:

﴿إِنَّ فِي الْحَبَّةِ عُرْفًا تَرَى طُهْرَهَا مِنْ طُهْرِيهَا، وَطُورَهَا مِنْ طُورِيهَا﴾. قَدَّمَ أُعْرَابِيٌّ

قَالَ: لِمَنْ هِيَ يَا رَسُولَ اللَّهِ؟ قَالَ: (لِمَنْ أَطَابَ الْكَلَامَ، وَأَطْعَمَ الطَّعَامَ، وَأَدَامَ الصَّيَّامَ،

وَصَلَّى اللَّهُ بِاللَّيْلِ وَالنَّاسِ نِيَامًا) [ترمذی، حسه الألبانی]

Maksudnya: “Di dalam syurga terdapat bilik-bilik, nampak dari dalam barang-barang di luarnya dan sebaliknya”. Bangun seorang *arabi* (orang kampung) bertanya: Untuk siapakah bilik-bilik itu wahai Rasulullah? Sabda Nabi ﷺ: “Bagi mereka yang baik percakapannya, memberi makan, sentiasa berpuasa dan bersolat kerana Allah pada waktu malam tatkala orang lain sedang tidur”. [HR: At-Tirmizi, hasan].

Al-Hasan al-Basri ؒ dan Ibnu al-Mubarak ؒ memberi makan para sahabatnya, sedangkan mereka sendiri berpuasa. Mereka duduk melayani

dan berkhidmat kepada orang yang makan serta memenuhi keperluan mereka .

Hammad bin Sulaiman رضي الله عنه akan menghidangkan juadah berbuka puasa untuk 500 orang ketika Ramadhan dan dia akan memberikan kepada setiap mereka 100 dirham di Hari Raya.

Ibadat memberi makan akan menjadi asas kepada banyak ibadat-ibadat lain, seperti rahmat dan kasih sayang terhadap sahabat yang diberi makan, dan ini akan menjadi salah satu sebab untuk masuk syurga, kerana sabda Rasulullah ﷺ yang bermaksud: "Tidak masuk syurga seseorang itu sehingga ia beriman, dan tidak beriman sehingga ia saling mengasihni." [HR: Al-Bukhari].

b. Memberi makan (berbuka) orang yang berpuasa:

Sabda Rasulullah ﷺ:

(مَنْ فَطَرَ صَائِمًا، كَانَ لَهُ مِثْلُ أُجْرِهِ،

غَيْرَ أَنَّهُ لَا يَنْقُصُ مِنْ أُجْرِ الصَّائِمِ شَيْئًا)) [ترمذي، صحيح]

Maksudnya: "Sesiapa yang memberi makan orang yang berpuasa, dia akan mendapat pahala sepertinya dan ianya tidak akan mengurangkan pahala orang yang berpuasa sedikitpun." [HR: At-Tirmizi, sahih].

Sabda Rasulullah ﷺ:

(أَيُّهَا النَّاسُ أَفْشُوا السَّلَامَ، وَأَطْعِمُوا الطَّعَامَ، وَصَلُّوا وَالنَّاسَ نِيَامًا، تَدْخُلُوا

الْجَنَّةَ بِسَلَامٍ)) [أحمد والترمذي، صحيح]

Maksudnya: "Wahai Manusia! Sebarkanlah salam, berilah orang makan dan solatlah malam ketika manusia tidur, pasti kamu akan masuk ke Syurga dengan sejahtera". [HR: Ahmad, at-Tirmizi, sahih].

Semua ini menunjukkan bahawa mengumpul-kan antara puasa dan sedekah adalah lebih berkesan untuk menghapuskan dosa.

Nabi ﷺ bersabda:

(الصَّوْمُ جُنَّةٌ، وَالصَّدَقَةُ تُطْفِئُ الْحَطِيئَةَ، كَمَا يُطْفِئُ الْمَاءُ النَّارَ، وَصَلَاةُ

الرَّجُلِ مِنْ حَوْفِ اللَّيْلِ)) [ترمذي وابن ماجه، صحيح]

Maksudnya: "Puasa adalah perisai. Sedekah akan memadamkan kesalahan seperti air memadamkan api dan begitu juga seorang lelaki yang bangun di pertengahan malam." [HR: Ahmad, at-Tirmizi dan Ibnu Majah, sahih].

5) Menjaga lidah, mengurangkan kata-kata dan menjauhi sifat dusta.

Sabda Rasulullah ﷺ:

(مَنْ لَمْ يَدَعْ قَوْلَ الزُّورِ وَالْعَمَلِ بِهِ، فَلَيْسَ لِلَّهِ حَاجَةٌ

فِي أَنْ يَدَعَ طَعَامَهُ وَشِرَابَهُ)) [بخاري]

Maksudnya: "Sesiapa yang tidak meninggalkan percakapan dusta dan terus mengamalkannya, maka Allah tidak berhajat agar dia meninggalkan makanan dan minumannya (yakni berpuasa)." [HR: Al-Bukhari].

Hadis tersebut menunjukkan bahawa berpuasa juga bermaksud menahan diri daripada pemboghongan dan kata-kata yang sia-sia dan

tidak berfaedah sebagaimana seseorang itu menahan diri daripada makan dan minum. Sekiranya dia tidak meninggalkan perbuatan tersebut, maka berkuranganlah pahalanya dan dia terdedah kepada kemurkaan Tuhannya.

Sabda Rasulullah ﷺ:

(إِذَا صَبَحَ أَحَدُكُمْ نَوْمًا صَائِمًا، فَلَا يَرُفُثُ، وَلَا يَجْهَلُ، فَإِنْ أَرَادَ شَاتَمَهُ، أَوْ قَاتَلَهُ

فَلْيَقُلْ: إِنِّي صَائِمٌ، إِنِّي صَائِمٌ)) [مسلم]

Maksudnya: "Jika seseorang daripada kamu mula berpuasa maka janganlah dia melakukan *Rafath* (melakukan perkara-perkara yang membangkitkan nafsu) dan janganlah dia bergaduh, sekiranya seseorang mencaci atau memusuhinya maka hendaklah dia berkata: Sesungguhnya aku berpuasa! Sesungguhnya aku berpuasa!" [HR: Muslim]

Ali bin Abi Thalib رضي الله عنه berkata: "Sesungguhnya puasa bukanlah hanya menahan diri daripada makanan dan minuman, tetapi juga dari penipuan, kebatilan dan perkara yang sia-sia".

Berkata Mujahid: "Dua perkara yang sesiapa meninggalkannya maka sempumalah puasanya: *Ghibah* (mengumpat) dan menipu". Abu al-'Aliyah pula berkata: "Orang yang berpuasa tetap dalam ibadatnya selagi dia tidak melakukan *Ghibah*".

Rahsia di sebalik larangan-larangan ini khususnya ketika sedang berpuasa ialah kerana *bertaqarrub* (mendekatkan diri) kepada Allah dengan meninggalkan perkara-perkara yang harus, tidak akan sempurna kecuali setelah meninggalkan perkara-perkara yang haram. Ia adalah seumpama orang yang meninggalkan perkara-perkara fardhu untuk melakukan perkara-perkara sunat, apakah faedahnya?

6) Doa, Zikir dan Istighfar.

Semua hari-hari Ramadhan adalah waktu yang mulia, maka ambillah kesempatan ini dengan memperbanyakkan zikir dan doa, khususnya pada waktu-waktu yang mustajab seperti:

- Ketika hampir waktu berbuka. Nabi ﷺ menyebutkan tiga doa yang tidak ditolak antaranya ialah orang yang berpuasa sehingga dia berbuka. [HR: At-Tirmizi, sahih]

- Di sepertiga malam ketika Allah ﷻ menyeru: "Adakah ada orang yang berdoa, maka aku perkenankan, adakah orang yang memohon keampunan, maka Aku mengampunkannya". [HR: Al-Bukhari & Muslim].

- Memohon keampunan Allah ﷻ ketika waktu sahur. Firman Allah ﷻ:

(وَالَّذِينَ آمَنُوا وَآلَاؤُهُمْ يَسْتَغْفِرُونَ ﴿١٨﴾ [الذاريات: ١٨])

Maksudnya: {Dan ketika waktu sahur mereka memohon keampunan}. [Az-Zariyat: 18].

Jangan kita lupa juga terdapat ganjaran-ganjaran yang besar bagi orang berzikir.

Terdapat banyak nas-nas al-Quran dan hadis-hadis Nabi ﷺ yang sahih menjelaskannya.

7) Umrah pada bulan Ramadhan.

Sabda Rasulullah ﷺ:

(فَإِنَّ عُمْرَةَ فِي رَمَضَانَ تَقْضِي حَجَّةً، أَوْ حَجَّةً مَعِي)) [بخاري ومسلم]

Maksudnya: "Satu umrah pada bulan Ramadhan ganjarannya menyamai satu haji". Dalam riwayat yang lain: "Menyamai satu haji bersamaku". [HR: Al-Bukhari dan Muslim].

8) Beriktikaf:

Antara kelebihan khusus sepuluh terakhir Ramadhan ini, ialah digalakkan beriktikaf padanya.

9) Lailatul Qadar.

Di dalam Ramadhan yang berkat ini Allah ﷻ menghadiahkan kepada hamba-hambanya satu malam yang sangat berkat iaitu *Lailatul Qadr*.

[Dua kelebihan ini (8 & 9) akan dijelaskan dalam risalah yang kedua insya'Allah]

Penutup:

Sabda Rasulullah ﷺ sewaktu menaiki mimbar di Madinah:

(رَغِمَ أَنْفُ عَيْدٍ دَخَلَ عَلَيْهِ رَمَضَانَ فَلَمْ يُغْفَرْ لَهُ)) [صحيح ابن حبان، صحيح أبي يعقوب]

Maksudnya: "Sangat malang, orang yang berkesempatan melalui Ramadhan tetapi tidak diampunkan dosanya". [HR: Ibnu Khuzaimah, al-Baihaqi]

Oleh itu, tidak sepatutnya bagi seorang muslim yang berakal melepaskan peluang yang amat bemilai ini untuk dirinya dan keluarganya. Ia hanya datang sekali dalam setahun. Marilah kita bertekad dan berazam untuk memperuntukkan waktu dan masa kita dengan amal ibadat bagi merebut peluang ganjaran pahala yang dijanjikan Allah dan Rasul-Nya.

Akhirnya, sama-samalah kita berdoa kepada Allah supaya diberikan kekuatan, taufiq dan hidayah semoga Ramadhan kita kali ini lebih baik daripada yang lepas, dituliskan nama kita di antara hamba-hamba-Nya yang mendapat keampunan Tuhan dan selamat dari azab Neraka. *Aaamin*.

Alhukum:
Abu Anas Madani, Pondok Sungai Durian, Kelantan.
23 Sya'ban 1428H- 05 Sep 2007.

Sumbangan untuk Pondok Sg. Durian boleh disalurkan melalui akaun di bawah

NAMA AKAUN DI (BIMB)	NO AKAUN
MADRASAH MUHAMMADIAH (Zakat, Derma)	03-072-01-011811-6
MADRASAH MUHAMMADIAH (Pembangunan Asrama / Pondok dll)	03-072-01-011983-9
MASJID AR-RAHMAN (Masjid Pondok Sungai Durian)	03-072-01-011294-2



www.dartaibah.com
(Siri 6)

رسالة

شهر رمضان المبارك

Risalah Ramadhan Al-Mubarak (1)

Amalan-Amalan Di Bulan Ramadhan.

Catatan:
Al-Faqir ila Allah;



www.abuanasmadani.com
1431H - 2010